



KANTONALNI SUD U SARAJEVU POTVRDIO OPTUŽNICU

Više od 400 dokaza protiv optuženih za ubistvo policajaca

LJ. RADIĆ

SARAJEVO - Kantonalni sud u Sarajevu potvrdio je optužnicu sa više od 400 dokaza protiv Save Marinkovića, Aleksandra Macana i Marka Trifkovića, koji su optuženi za ubistvo policajaca Adisa Šehovića i Davora Vujinovića, pripadnika MUP-a KS ubijenih 2018. godine.

Protiv njih je optužnicu podiglo Tužilaštvo kantona nakon intenzivne i kompleksne višegodišnje istrage.

PODIZANJU OPTUŽNICE PRETHODILA KOMPLEKSNA ISTRAGA TUŽILAŠTVA KS

Optužene terete da su 26. oktobra 2018. godine u naselju Alipašino polje oko 4.20, nakon što su ih policijski službenici zatekli u krađi vozila u Geteovoj ulici, ispalili najmanje 20 hitaca u Adisa Šehovića i Davora Vujinovića.

Policajci su se nalazili u službenom automobilu.

Šehović je od zadobijenih povreda odmah preminuo,

dok je Davor Vujinović bio teško ranjen, ali je nekoliko sati nakon toga podlegao povredama.

"Podizanju optužnice prethodila je kompleksna istraga Tužilaštva KS u saradnji sa Državnom agencijom za istrage i zaštitu i istražiteljima MUP-a KS", rekli su ranije iz sarajevskog tužilaštva.

Kako su tada naveli, u predmetu su postupajuće tužiteljke preduzele više od 2.500 radnji dokumentiranja i dokazivanja.

"Među dokazima su, između ostalog, i dijelovi automobila seat leon, kao i dijelovi puškomitraljeza sa 20 čahura iz kojeg su ubijeni policajci, a koji su pronađeni zakopani u Palama. Saslušano je i oko 500 osoba", navode iz Tužilaštva.

Dodali su da je ostvarena saradnja s Europolom i Interpolom i sa nadležnim organima sedam država i to: SAD, Francuskom, Njemačkom, Crnom Gorom, Srbijom, Hrvatskom i Kanadom.

"Neki dokazi su potkrijepljeni i podacima iz aplikacija Sky i Anom koje je pribavilo ovo tužilaštvo putem međunarodne pravne pomoći, tačnije pravosudnih organa SAD i Francuske", rečeno je ranije iz Tužilaštva.

